

Atham woIpranin

Atham iaine ul woIpranin

Lon lonothon

Atham enni wapul ipangkene akkokurrot akwokurrine cungkut coul woIouth ioccoothe lon loMiccie ana cakuruk iammakot oIeccuo. Kwokurrot akwokwarikiet kin itti okin tha'rungkot ithocokot lon nomikït then noma'ri mothokkiettat thiak.

Atham enni wakene itti oIeccuo ukul woKapik okkwi ipakeneron anganna itti Kapik okkwen (Ipranin 1.1–3).

Kwonu pu'ran kannan nou'rupa wothothilettat woKapik iaul woIouth woccoothe lon len nomikït (Ipranin 1.4–2.18).

Ook akkoporot kannan noul wothernte lon loKapik woma'rot, ana ook akkoporot kannan naMucca ipethet ul woIouth lon lothonce'ret lon cik loKapik (Ipranin 3.1–4.13).

Ook akkoporot kannan noul wonoppan toKapik woIouth, akka kwannokkot lon ilokithak aththik. Kwethet ka kung ammakka papu pothokiot ngüccük cik ipella lon lokithak ipokiakinthet lon cik ilokithak loul noma'ri appik (Ipranin 4.14–10.31).

Pul ipokurrot atham popiranet thiki thoul woIouth noka ikkot cik nthocokot lon nomikït. Kwokwarikiekathe ul ioccoothe lon loIeccuo itti okin cakuruk thonu itti okin thanekket cikït noKapik ana okorronno ure nongre ana thongkene itha oIeccuo pongkenet aththik (Ipranin 11–13.25).

Ukul woKapik akkrik nou'rupa wothothilettat woKapik

¹ Kapik kerntenet thiki thonnon ma'rot ma'ri mop-pot nnul wothernte lon loKapik ana nathar kurekkurek,
² anaruk noma'ri emmi imocothothe, kernet ton nukul wung ia kwopakkethe na'rupu woththan appik ana ia kwokkothe capu ngngin. ³ Ukul wung wathoporot thothrik thoKapik ana wungkworok llon appik. Ukul wangwot ana okkot lon appik mpu'ran polon lung. Anakka kwonthukkiet kin, Kapik kikkiekathok cik ic-cik kung nthokkun wothothari woKapik ikaik tothi'rot.
⁴ Ittina kwothakkathe prik nou'rupa wothothilettat woKapik ana k'ran kung ika Kapik kethok krik nou'rupa wothothilettat.

⁵ Oththa nti iu'rupa wothothilettat woKapik ia Kapik ki'rethe itti,

“Oung ukul win,

inenni mpothakkat oththe”?

Ana itti,

“Mpathakkanok oththan pung

ana ook othakkanin ukul win”?

⁶ Ana attang amma Kapik ona ukul wung wonothon nocapu, ki're itti,

“Au'rupa wothothilettat woKapik appik a'ranok nga'rama.”

⁷ Ana Kapik kerekanthet u'rupa wung aki'rekat itti,

“Kathikkie u'rupa wothothilettat woKapik kanang ana ul iarekinok lu're lolik.”

⁸ Anaruk kwerekathe Ukul akwi'rekat itti,

“Kapik, ngili ngang nga'rungkot cik thupuththuput.

Ana thoporot thang tokit koKapik thaka cu'rang coili ngang thupuththuput.

⁹ Ngkwongothe lon iloco'rotheik ana 'ra lon ilokithak,

Ilen akka oun Kapik kang pothikkierung priik
nakarkangon
ntho'rokung ngaak ngothopira noka athakka ili.”

¹⁰ Ana kwi'rekathe cakuruk itti,

“Ili, nci nomun, ngkwoku'ret capu ncik

ana tothi'rot tangkwokkothe nyaun nyang.

¹¹ Capu ana tothi'rot thintat cik okin thukkwa ana okit-
tako ere eret ana okucittakoik ere eret anaruk
ngkwa'rungkwot cik.

¹² Ngkwa'remethet kin tit ere kret ikakatta ikukwit
ana oportto kin cik ere eret.

Anaruk ngkwa'rungkot cik ammakka ngkwaik,
ana luput lang lakorronno omattat.”

¹³ U'rupa wothonhiletat woKapik wiatha ia Kapik ki'rethe
itti,

“Ikkik iccik kin nthokkun wothonhari win puccuk
anonekkekat tho'rak thang iracok tang acukkwarat kin
cik”?

¹⁴ U'rupa wothonhiletat woKapik appik wakanang
ikareko, okin thothilathe akin athorekine ul iaik
wathopakkot notho'rettat.

2

Nokorronno ocottako nti ilon loKapik

¹ Oron thonu itti oron thaccot kit cik papenang nolon
ilaron thoccikothe othakka itti aron okorronno urat cik.

² Akka amma oron thina lon lothonce'ret lon cik ila u'rupa
wothonhiletat woKapik weret laik icat ana la'rungkot cik,
ana pul ipaurrot lon cik 'ra lon lon pakkmako thakkmako
ithekkot nolon ila kwokkothe, oron thina eret lon lothon-
ce'ret lon cik itti oron tha'rettat tat ana manna itti oron
thikkoik tat ³ oron thalukkwot thakkmako taththa amma

1:9 1.9 Mocumur 45.6

1:12 1.12 Mocumur 102.25-27

1:13 1.13

Mocumur 110.1

oron thorakket tho'rettat enthi ithrik? Tho'rettat itha Ili wi'ret cittokit, thaul iocckithe wokenet ton itti thaik icat. ⁴ Kapik cakuruk kokenet lon len itti laik icat llon prek ana nthokkot lon ilaprttakiettot tit ana nthokkot lon ilommaththik ana kwikkekathe ul a'rupu wothethet nuthuk woKanang ikupure ammakka kongothe.

Oieccuo pul ammakka opangon

⁵ Kapik kannonekkes capu ncik appik ikkun wou'rupa wothothilettat woKapik ana ilen akka oron thaik theret.

⁶ Anaruk ammakka opilin pi'rettat imakkren itti,
 “Pul iponyi piatha ipa akwarttikot,
 ana ukul wopul wointha ia ngkwaik pa'rumo nolon len?”

⁷ Ngkwothikkierok potteik papotte nou'rupa wothothiletat woKapik
 ngkwethok lon appik ikkun wung ana thothiakinet cik.

⁸ ana ethok lon ikkun la'rupu appik.”

Ana amma Kapik kethok lon ikkun la'rupu appik, lella ila Kapik kokwentot ilella ikkun wung. Ana icci inenni oron thakinnimma itti lon appik laik ikkun wung. ⁹ Anaruk oron thei thimmat oieccuo ipa pothikkiettat potteik papotte nou'rupa wothothilettat woKapik pakiettat cupul cothrik inenni ana cothothiakineik akka kwocckothe thiak akwiat, othakka itti nthoporot thoKapik kwianthet ul ncik appik.

¹⁰ Loco'rotheik tulluk itti Kapik ikoku'ret a'rupu ncik appik konu itti kathikkie oieccuo poporot kirkkir nthocokot thiak othakka itti akona nyukul nyoppot ithrik thung. Akka oieccuo akka'ret kin. ¹¹ Okkwi ipathikkie ul wupupure ana okkwion ithothakkat thupupure thaku'ri.

Ittina oIeccuo pakannothiaik itti kwakkarokin itti opangon. ¹² Kwi'ret itti,

“Mpakene opangkingon k'ran kang,
mpamerekethung ngkunya ka'rama tokit koul.”

¹³ Ana kwi'rekathe attang itti,

“Mpanekket cikit naak.”

Ana kwi'rekathe attang itti,

“Mpei, ana nyukul inya Kapik kethin.”

¹⁴ Ana inakka nyukul nyaul ionyi ngka ana ngüccük, oIeccuo pothakkat cakuruk karkken ngka ana nngüccük othakka itti nthio thung akwokitto pu'ran popul pothopulut iponu pu'ran ikkun pothio ¹⁵ othakka itti akwelikko okkwion ithokakkat iak won're nothio. ¹⁶ Akka linako nan itti kwaik pakinnittarot u'rupa wothothilettat woKapik anaruk kwaat itti kwathittarot nyukul nyAprein. ¹⁷ Ittina kwonu itti kwaka ammakka opangon llon appik othakka itti akwona thiak ana oka pul iprik ponoppa toKapik iparekine Kapik. Ana o'rumo nolon ana ina akka akwetthet Kapik a'rupu wothokiot ngüccük cik iapa're thua ka thoKapik cik. ¹⁸ Akka kwoccoke the thiak ngka kung ca'ri ica kwennekkettat, ittina kwina ittarat okkwion ithaik thennekketta.

3

OIeccuo akkrik naMucca

¹ Ittina, pangkingon ithupupure itha Kapik kakkarot akin oka ithakkarako thorothe'rot. Noccot kit naIeccuo pul pothothilettat ana pul iprik ponoppa toKapik iparon thoccoke the lon len nomikit. ² Kwokat po'rumot nolon lokkwi iponekkethok cik, ammakka oMucca pokat po'rumot norupan toKapik appik. ³ OIeccuo pincathe pekkot nan itti kwathiakine cik naMucca ammakka pul

ipunot man pathiakine cik kannan noman imuntat. ⁴ Akka man imuntat mapul akkuno anaruk Kapik akkokkothe a'rupu ncik appik. ⁵ OMucca pokat po'rumot nolon appik ammakka pul iporekot noppa toKapik appik ana eret lon ilathi'retta noma'ri imanthan. ⁶ Anaruk oMiccie po'rumot nolon ammakka ukul ionu lon ikkun lokaman koKapik. Ana oron thaka kaman kung, amma oron akkonekkethe cikit notho'rikot cik thonnon itharon thaik thipinthet ka thoura.

No'rumoik noul iakannocokot lon loKapik

- ⁷ Ittina ammakka Kanang ikupupure ki're itti,
 “Inenni, amma onon thocckithe po're pung,
⁸ annokorronno onthoma ma
 ammakka nthokkothe akka nth'rat Kapik
 noma'ri mothennekketta akka nthokat ika kotham-
 pang.
⁹ Na aththen thennekkerin
 ana okin thimmat lon ila mpokkothe noluput arrial
 we'ra (40).
¹⁰ Ilen akka mpuakanthet ka kothiki then,
 ani'rekat itti, ‘Mikit men mampa'roik appinappin,
 ana okin thomma lon ila mpongothe itti okin
 thakkot.’
¹¹ Ana mpokkwathe mio nthua ka itti,
 ‘Okin thakorronno ao noka'ran na anongoko.’ ”
¹² Pangkingon, nokatha itti opilin pella ianon iponu lon
 lokithak ana cikit cakannocokot lon loKapik icapa'roik
 nolon loKapik ikaik icat. ¹³ Anaruk nittararot appinappin
 inakka ca'ri caik, itti oron thittararot appinappin othakka
 itti apilin nti ianon okorronno onthoma ca llon ngkarra
 ilokithak ila kwonu nocikit inakka ca'ri caik inenni.
¹⁴ Akka oron thothakkat thulukku ilon loMiccie amma

oron tho'rungkwothe nolon puccuk ilaron thoccokothe nomikït lung ilaron thonat ncinnomun. ¹⁵ Ammakka li'rettat itti,

“Inenni amma onon thocçikothe po're pung,

annokorronno onthoma ma,

ammakka nthokkothe ma'rot akka nth'rat lon loKapik.”

¹⁶ Oththan akkocçikothe lon loKapik ana okin th'rakathe? Okorronno oka okin itha aMucca ponat noththok poMucciri? ¹⁷ Ana okkwengon akka Kapik kokat kua ka ken luput arrial we'ra (40)? Okorronno

oka ul iokkothe lon ilokithak ailekat ika kothampangi?

¹⁸ Ana okkwengon akka Kapik kokkwinet mio itti okin thakorronno ao noka'ran kung na akwongoko? Okorronno oka okin ith'rat occokot lon lung nomikiri?

¹⁹ Ittina oron thakatha itti okin thakorronno oingkat noka'ran kothongoko koKapik akka okin thakannocçokot lon lung nomikït.

4

Ca'ri caCepith cothongoko thoul woKapik

¹ Ana inakka Kapik konekkenthet ton lon cik itti oron thaeo noka'ran kung kothongoko larthuk laik, no'rumoik akka apilin nti ianon oththurat. ² Akka oron thocçikothe cakuruk lon iloporot loIeccuo ilongkenettat ton ammakka

okin thocçikothe, anaruk lon ilakin thocçikothe lellat lon cik nakin akka okin thakannokottot nthocçokot lon nomikït. ³ Inenni oron ithocçokothe lon loKapik nomikït thaeo noka'ran kothongoko ken, ammakka Kapik ki'ret nthokkwo mio itti,

“Mponekkethe lon cik nthua ka itti,

‘Okin thakorronno ao noka'ran kin kothongoko.’”

Ana icci ngre ngung ngokat ngocothakothe ncinnan, acapu appik carthuk oku'retta ncik. ⁴ Akka oron thina itti Kapik kerethe maun ime're'rapuruk imakkren aki'rekat itti, “Noca'ri ice're'rapuruk Kapik kongokot nti iire ngung appik.” ⁵ Ana attang kwappropakkekat ilon ila kwi'ret thoceken itti, “Okin thakorronno ao noka'ran kin kothongoko.”

⁶ Ana larthuk icci itti opilingon thao noka'ran ken okkwion thorokit ithocikotho lon iloporot loleccuo thakanni'rikat noka'ran kothongoko ken akka okin thakorronno occokot lon len nomikit. ⁷ Ilen akka Kapik kappronekkenthet ca'ri c'rek cik ana kocciekathe itti “Inenni” cothi'riko noka'ran kothongoko thung. Kapik keret elli oThauth ngngin luput loppot akka ul woIccereil woprttakothe iKapik ntit iatham wen iulukku aki're itti, “Inenni amma onon thocikotho po're pung, annokorronno onthoma ma.”

⁸ Akka amma oCeccua pappethet kin ka'ran kothongoko, Kapik kakannerethe ca'ri c'rek. ⁹ Ittina icci ca'ri caik caCcepith cothongoko thoul woKapik. ¹⁰ Ana okkwi ipi'riko noka'ran kothongoko koKapik kwangoko cakuruk nti iire ngung ammakka Kapik kongokot nti iire ngung. ¹¹ Ittina ton othipoik aron i'riko noka'ran kothongoko koKapik othakka itti apilin okorronno oththurat cik nti ithonthoma ca thung ammakka okwion ith'rat occikot lon loKapik.

¹² Akka lon loKapik laik icat ana laik lareko. Lorrerre noki'rittang ikorre ikukwit ana li'riko ciki ikkwa itho'rküt thoka ana iutha ana imapurut ana ithucca thomummian ana lina lon laath're ana lon ila cikit congothe. ¹³ Lon lella ila arukwot Kapik nolon iloku'rettat ncik appik. Lon

laik tokit kung attattar ana ook akka oron erene lon ilaik appik.

Oleccuo pul ponoppa toKapik iprik

¹⁴ Ittina tun o'rumo nothocokot lon loKapik nocikit akka oron thonu pul iprik ponoppa toKapik oleccuo ukul woKapik iaron omakot lon len akka woku'rothe ana i'riko ithi'rot. ¹⁵ Akka oron thella pul iprik ponoppa toKapik ipakonnocokot thiak thonnon anaruk oron thonu okkwi ipennekkettat llon appik ammakka oron thennekkettat anaruk kwakannokot lon ilokithak. ¹⁶ Ittina tun othakkarot iccik koprorok pothoporot thoKapik nthonekket cikit nan othakka itti aron iot thiak ana thoporot thoKapik ithittarot ton amma oron ipitto lon l'rek.

5

¹ Pul iprik ponoppa toKapik panekkettat cik nti iul anaocco lon ikkun itti perene Kapik lon loul ana ethet a'rupu wothethet nuthuk ana ethet Kapik a'rupu wothokiot ngüccük cik wothonekot kin lon ilokithak. ² Ook ngka kung pina akka akwittarot ul iommaik kiccekice ana waik waeo ngkathar threk akka ook cakuruk pakkot lon moloko. ³ Ilen akka akwethethet Kapik a'rupu wothokiot ngüccük cik nti ilon lung ilokithak ana acakuruk nti ilon loul ilokithak.

⁴ Pul pella paneko thothia cik enthi akwonekket noka kung kwonu itti kwakkarako ngKapik ammakka kakkarot Arun. ⁵ Ittina oMiccie cakuruk pakannothikkie ka kung prek pul iprik ponoppa toKapik anaruk Kapik akki'rethok itti,
“Oung ukul win,

inenni mpothakkat oththe pang.”

⁶ Ana Kapik ki're noka'ran k'rek itti,

“Oung pul ponoppa toKapik thupuththuput
ammakka katha koMelkkicathik pokat.”

⁷ Ana manna oIeccuo ngka kung noma'ri mothikkoik thung nocapu kwa'ra'rat nga'rama mpo're citta ana ngeme, akwipittot Kapik akipo thiak thung, okwi iponu pu'ran akwo'rethok nti ithio ana Kapik koccikanthok akka kwocikotho lon loKapik. ⁸ Antoka manna itti oIeccuo pokat ukul woKapik anaruk kwinat thocikot lon, nothiak itha kwociccokotho ⁹an akka kwothakkiettat poporot kirrkkir, kwothakkakathe katha kotho'rettot koul iaccikot lon lung kothupuththuput, ¹⁰ akka Kapik konekkethok cik pul iprik ponoppa toKapik, ammakka oMelkkicathik pokat.

Nokorronno ocottako nti ilon loKapik

¹¹ Laik loppot ilanin thongothe itti onin theret anaruk lonthomat ongkenetta akka onon thomma ina lon cococokot. ¹² İcat onon thira thaakat ul iangkene noma'ri emmi p'rin anaruk onon thonu itti onon thangkenetta lon loKapik locittokit ilaik İcat. Akka onon thanyukul inyarran inyako akka nyomma o'rko thu'rit ithonthomat. ¹³ Okwi iparthuk paik pako ngimmik ngulluk, kwarthuk paukul iotteik kwomma lon iloco'rotheik. ¹⁴ Anaruk thu'rit ithonthomat thoul iocokkat iongkenettat itti okin thapetto ilon tat iloporot ana ilokithak.

6

¹ Ton eo tokit nnothongkene thonomun aron oine thongkene ithakorronno aron oka thonthomat. Ton opa'rine thongkene thonomun cik itharon thinat itheret oMiccie. Oron thonu itti oron thannonekket millang mothopa'rine lon cik ilokithak ilanekarot nothio ana wothocokot lon nomikit, ² ana tat akka aron ethet ul

mamuthie ngng'ri ana thathuma thothonekket nyaun noul, ana itheret lon lothuroko thoul illet nti ithio ana itheret lon lothakkmako thothupuththuput. Ton okorronno opakot nolon len attang anaruk ton eo tokit ilon loul iop'rintittat ithocokot lon loKapik nomikit ana cakuruk llon ilaron therethe amma Kapik kongothe. ³ Ana amma Kapik akkongothe ana oron thakkot lon len.

⁴ Laka lonthomat noul iopa'rinet lon loKapik cik itti wakkaprttako ntan akin opa'rine lon cik ilokithak amma winat lon loKapik ana okin ithina lon kicce la'rupu ia Kapik kethet kin nuthuk ana ithokat tothun akin oKaning ikupupure, ⁵ ana okin ithinothe thoporot tholon loKapik ana pu'ran poluput ilaik lanthan. ⁶ Laka lonthomat noul iopa'rinet lon loKapik cik itti wakkaprttako ntan akin opa'rine lon ilokithak cik, akka thopa'roik then okin thaik thakkwet ukul woKapik nothapak ncinomun attang ana attang akin othiekathok cik tokit koul.

⁷ Capu icikko ng'ri ngokapik ikapukkot nan appinappin ana icakwonine ul mil moporot iorat nan, conu thethie thoKapik. ⁸ Anaruk capu icakwono li ana taco irokithak ana cakko napuththut caKapik attatta ana ok'retta.

⁹ Puruko pingon, amma manna onin thanteret non ittina, onin thonekkethe cikit nolon kicce itti lon laik loporot nanon lotho'rettat. ¹⁰ Kapik kakannokwiet lon ana kakannure nore ngon ana thongat ithanon thokenerok nthittarot ul wung ana nthittarot ithanon tho'rungkothe nan ittarot kin. ¹¹ Onin thongothe itti ntharungkot nothongarot thon puccuk acapu ocothakat othakka itti atho'rikot cik thon oka icat. ¹² Onin thakannangkot itti onon thaka thonu ngore anaruk ninnikot okkwion ithocot lon ilonekkettanthe kin cik nthocokot lon nocikit ana nthocokot cikit ilon.

Lon ilaik icat lothonekket lon cik thoKapik

¹³ Ca'ri ica Kapik konekkenthet Aprein lon cik, pul pellat iprik noKapik ipa akwokkwo mio ngngin, kwokkwanthet Aprein mio ngk'ran kung, ¹⁴ aki'rekat itti, “Mpethieng icaricat ana ethung thiki thoppot.” ¹⁵ Anakka Aprein po'rikotheik nthocokot cikit, lon lokkattakanthok ilokat lonekkettanthok cik.

¹⁶ Amma ul wakkwo mio, wakkwo ngk'ran kopul iprik nakin ana thokkwo mio then thak'ro lon appik ana oce're tha'retto. ¹⁷ Anakka Kapik kongothe itti kakene ul wung wothopakkot nolon itti thonekket lon cik thung thaik icat ana thakannoprttakoik, kwokkwanthet kin mio. ¹⁸ Kapik kokkothe elli, othakka itti na'rupu ie'ra iakannoprttakoik ana ia Kapik kakannammikkot ngngin, oron ithollothe naak aron occokot tho'rikot cik ithettatheron ana opo'rathan kannan. ¹⁹ Tho'rikot cik thonnon en-thi tha'rumo naron ana thonthomat ere paponte ipac-cokot kuppuru'ng kono'i'ri irok akokorronno eo imakkren. Tho'rikot cik then akkanekot ton noka'ran ikupupure kannan ikaik tho'rathan kret ikollikinetton cik, ²⁰ na aleccuo pi'rikinet ton, kwothakkat pul iprik ponoppa toKapik thupuththuput ammakka oMelkkicathik pokat.

7

Pul ponoppa toKapik oMelkkicathik

¹ OMelkkicathik empi pokat ili wonoka'ran koCcalim ana pul ponoppa toKapik ikrik. Kwokottot iAprein, Aprein pokat cik akwokkaprttako ntan nti itho'rak akkwalkothe nili, aMelkkicathik ethiekathok. ² Aprein pillillathe ia'rupu ia kwonat nti itho'rak attul attul ana kwekatho oMelkkicathik pulupuluk nan. Cittokit k'ran koMelkkicathik konu itti, “ili iakkot lon iloporot,” ana cakuruk itti, “ili woCcalim” ilonu itti, “ili iakkot

thomicco.” ³ Lon lella ilerethe lon loththan ana lonnan ana opikion ana kwellat luput cik ana thocothakot thothikkoik, kwammakka ukul woKapik ana kwa'rungkot pul ponoppa toKapik thupuththuput.

⁴ Antokatha tat akka opiki pokat priik, Aprein manna ipokat oththan poul appik pethok a'rupu wululuk na'rupu ia kwillillot tit attul attul ia kwonat nti itho'rak. ⁵ Lon lothonce'ret lon cik loMucca lipittot thiki thoLai ithothakkat ul wonoppa toKapik akin a'rntot a'rupu wululuk na'rupu woul ana napangon. Ul wen wokathiki thAprein. ⁶ OMelkkicathik pokat pakannoka nothiki thoLai anaruk kwocot a'rupu wululuk na'rupu iAprein pokat ponat nti itho'rak. Ana oMelkkicathik pethiekathe Aprein ipa Kapik konekkenthet lon cik. ⁷ Ana ammakka ul wina appik, ilaik itti pul ipriik akkethie pul ipotte. ⁸ Ul wonoppa toKapik ia'rntothe a'rupu wululuk na'rupu woul, waul ionyi ana okin thille anaruk lon lella ili'ret itti oMelkkicathik pio ana ook akkocot a'rupu wululuk na'rupu attul. ⁹ Ittina oron thi're manna itti thiki thoLai ithaik tha'rntot a'rupu, thethet oMelkkicathik a'rupu cakuruk Aprein ngngin ca'ri ica kwethet oMelkkicathik a'rupu, ¹⁰ akka oMelkkicathik pokottot iAprein aLai pokat parthuk okwonta nti ithiki itheot thAprein.

Oieccuo pammakka oMelkkicathik

¹¹ Amma ngre ngoul wonoppa toKapik woLai ioku'rettat nolon lothonce'ret lon cik ngokat ngokkothe lon kicce ia Kapik kongothe, ngintha akka pul ponoppa toKapik p'rek appaine p'rek ngkathar koMelkkicathek okorronno oka ngkathar kArun appokaik? ¹² Akka amma ul wonoppa toKapik woprttakot cik lon lothonce'ret lon cik loul wonoppa toKapik laprttakoik cakuruk. ¹³ Okkwi ipa lon elli laik leret cene, ook ipaat nothiki th'rek ana pul pella nothiki then iporekot noru'rot tonoppa

toKapik. ¹⁴ Akka linako nan itti ili oIeccuo wokwontat nothiki thoIoutha, ana thonce'ret lon cik thoMucca thakanneret lon len akka therethe ul wonoppan toKapik.

¹⁵ Ana ilaron thi'ret linako nan kicce amma pul p'rek ponoppan toKapik pummothe ncik pammakka oMelkkic-cathik, ¹⁶ ook ipakonnothakka pul ponoppan toKapik llon lothonce'ret lon cik loul ionyi anaruk mpu'ran pothikkoik ithakannomattat thupuththuput. ¹⁷ Akka li'rettat itti,

“Oung pul ponoppan toKapik thupuththuput,
ammakka pul ponoppan toKapik oMelkkic-cathik pokat.”

¹⁸ Ittina lon lothonce'ret lon cik ilipe lopa'rakinet cik akka lokat lakannoka lonthomat ana lellat ngre cik, ¹⁹ akka lon lothonce'ret lon cik loMucca lokat lakannokkot ngre papennang. Ana inenni tho'rikot cik ithoporot thei ithanekot ton iccik koKapik.

²⁰ Akka pul ponoppan toKapik ponekkettatheik nthokwo mio. Anaruk a'rek wonekkettatheik okorronno oka nthokkwo mio. ²¹ Anaruk kwothakkat pul ponoppan toKapik nthokkwo mio akka Kapik ki'rethok itti,

“Ili wokkwot mio llon lonthomat ana wakorronno oprt-toik,

‘Oung pul ponoppan toKapik thupuththuput.’”

²² Ana nti ilon lothokkwo mio enthi, oIeccuo pothakkakathe pul ipangwot lon lothonekket lon cik iloporot.

²³ Ul wonoppan toKapik wokat cik woppot anaruk thio makorronno okorronno akin o'rungkwot ire ngoul wonoppan toKapik. ²⁴ Anaruk inakka oIeccuo pakinnio thupuththuput, kwaka pul ponoppan toKapik thupuththuput. ²⁵ Ittina kwa'ret ul kirrkkir iaine Kapik

ngk'ran kung akka kwakkoik othakka itti akwerene Kapik nti iakin.

²⁶ Pul iprik ponoppa toKapik ammakka empi kwathin-thet ton ilon appik, kupupure ana kwella thorukwettat cik ana kwo'rillir kwopettakot nti iul iakkot lon ilokithak ana kwonthuttathe ithi'rot. ²⁷ Kwakannoka ammakka ul w'rek ittittik wonoppa toKapik, kwakannethet Kapik a'rupu wothokiot ngüccük cik appinappin, nti ilon lung ilokithak ana nti ilon loul ilokithak. Anaruk kwethet ka kung ere papu wothokiot ngüccük cik nti ilon loul, ca'ri culukku kirrkkir, noca'ri ica kwangkothe itti kwiot nothapak. ²⁸ Akka lon lothonce'ret lon cik loMucca lanekket ul ittittik wonoppa toKapik cik iakannoka wonthomat. Anaruk thokkwo mio thoKapik ithomakothe lon lothonce'ret lon loMucca thonekkethe ukul cik iothikkiettattat woporot kicce thupuththuput. Ukul akkaka pul ponoppa toKapik iprik pothupuththuput.

8

OMiccie pul iprik ponoppa toKapik pothonekket lon cik ilie

¹ Lon anganna ilanin thaik theret cene itti oron thonu pul iprik ponoppa toKapik ipikkot cik thokkun wothothari woKapik tothi'rot, ² ana ook ipareko noka'ran ikupupure tothi'rot icü'rük icaik icat ica Kapik kokkothe ngka kung, okonnoka pul iponyi.

³ Pul iprik ponoppa toKapik wipakot cik, aethet Kapik a'rupu wothethet nuthuk ana wothokiot ngüccük cik, pul ponoppa toKapik empi ponu itti pethet Kapik a'rupu w'rek cakuruk. ⁴ Amma kwappokat nocapu kwakannokat pul ponoppa toKapik akka ul waik ncinnan iethet Kapik a'rupu ammakka lon lothonce'ret lon cik loMucca li'ret. ⁵ Ngre iaul wonoppa toKapik waik wareko noka'ran ikupupure ngapurrun pongre iaik icat iaik tothi'rot. Ilen

akka Kapik ka'rettot naMucca akka kwokat cik akwothuno cü'rük coret icupupure itti, “Amma auno tu'rot, auno cü'rük cungkot ica mpokenethung noco'rong.” ⁶ Anaruk ngre ialeccuo pettathe akkrük nongre ngoul wonoppantōKapik, ien thonekket lon cik ithie ithrik itha oIec-cuo papul pokathar pen, ana ithen akkrük naithipe akka thonekket lon cik ithie akkoprot ana thuntathe nothonekket lon cik ithoprot.

⁷ Akka amma thonekket lon cik thorokit thellat lon tit ila moloko, thonekket lon cik ithie thakannonekket-tatheik. ⁸ Anaruk Kapik kiothe lon lamoloko noul wung ana ki'rekathē itti,

“Ca'ri caik canthan, Ili wi'ret,
ica anonekket lon cik ilie
nul woIccereil ana nul woIoutha.

⁹ Thonekket lon cik enthi thakannoka ammakka
ithanin thonekketheik inothiki then,
ca'ri ica mponekot kin nukun win

akka mponat kin noththok poMuccir,
akka okin thakanna'rungkot notho'rumo nolon lin ilanin
thonekketheik
ana mpopa'ranthet kin cik.

¹⁰ Ili wi'ret itti, thonekket lon cik enthi itha mpaik
panekket cik nul woIccereil

noma'ri imanthan,
Mpanekket thonce'ret lon cik thin ima men
ana okurrot nomikit men.

Mpaka Kapik ken
ana okin thaka ul win.

¹¹ Pul pella ipappongkene pul ponocuruk cung ana opang
itti, 'Ina Ili,'
akka okin appik thinan itharran ana ithittittik.

¹² Akka mpaccikinthet kin lon len ilokithak

ana mpakorronno appokwarttikot athar wen iokithak ana lon len ilokithak attang.”

¹³ Ana amma Kapik eret thonekkes lon cik ithie kwothikkiet thonekkes lon cik thorokit thella ngre cik ana lon appik ilipe ana ilukkwat lakko napuththut lintat cik.

9

Tha'rat nga'rama icü'rük icokkattathe noret conocapu

¹ Lon ilonekkettatheik locittokit lonat lon ila ul omakot lotha'ra nga'rama ana cü'rük icokkattathe noret conocapu ca'rama. ² Cü'rük icokat cuntat neret conat kaman icarak than ke'ra. Man mocittokit monat papu pothaap ipo'rillir iponu ka'ran ikanekketat thik nan, ana kuppurung kothu'rit ana arrakith iothun iettathe Kapik, ka'ran ken kokat akakkarako itti ka'ran ikupupure. ³ Ana ka'ran ikokat tho'rathan thokeret ikapetto icü'rük konat k'ran itti ka'ran ikupupure kannan. ⁴ Ka'ran ikupupure kannan ken konat tu'rot irak'rettat nga'ra nan tothaap ana centhuk cothonekkes lon cik cothaap. Ana centhuk cen conat cakra cothaap tit iconu thu'rit tit ithocot k'ran itti manna, ana conat cu'rang caArun icacciathe kunu kopira ana pothok ipaka'racak ipappokurrakothie thonekkes lon cik nan. ⁵ Ana to'ra wocenthuk a'rupu wokot cik nan we'ra wakene thrük thoKapik wonat u'ruccu ana to'ra wen u'ruccu wokot cik a'rumot centhuk. Centhuk cokat na pul ponoppa toKapik o'ro ngüccük cik nti ithocokot lon ilokithak. Anaruk oron thakanneret lon len ncik appik inenni.

⁶ Amma a'rupu wokuccettathe cik, ittina ul wonoppa toKapik waukkukko noka'ran kothapat ikupupure athokkot ngre ngen. ⁷ Anaruk pul iprik tulluk ponoppa toKapik akki'riko noppa ten ciththo'rot ca'ri culukku

nothuput, ana kwakinni'riko akkwella ngüccük ia akwethet Kapik nti ilon ilokithak lung ana nti ilon ilokithak loul iakin thokkothe akin thomma. ⁸ Ilon elli appik Kanang ikupupure kokat cik akokene itti kathar ikaeo noka'ran ikupupure kannan karthuk anyattat amma cü'rük icuntat neret wonocapu ca'rama carthuk caik nor. ⁹ A'rupu enni waik wangkeneron lon loma'ri emmi, wakene itti thethet a'rupu nuthuk ana thokinthet Kapik ngüccük cik thakannime pul ipocokotho lon loKapik. ¹⁰ Thongkene enthi thakene lon lothu'rit ana thikkoik ana thangkene athar kurekkurek wokamuthe kothilakko lon loka nthapat noma'ri motte puccuk aKapik onakat kathar ikie.

OMiccie papul pokathar pothonekkt lon cik ilie

¹¹ Akka oMiccie paat ammakka pul iprik ponoppan toKapik, polon iloporot ilaik cene ncinnan, kwi'rikot icü'rük tothi'rot icirik ana icoporot kannan ica pul iponyi pakannokkot icakannoka conocapu. ¹² OMiccie pakinni'riko noppan irupupure kannan ngngüccük ngonyitipit ana nyonyura anaruk kwi'rikot noppan irupupure kannan ca'ri culukku ammakka kwaik ngngüccük ngung ana kwonakanthet ton tho'rettat thothupuththuput. ¹³ Ngüccük ngonyitipit ana ngonyura ana mucuk momor imari imok'rettanet Kapik ma'rutta nul ionu lon ilokithak, athikkie ka ken ko'rillir. ¹⁴ Anaruk ngüccük ngoMiccie akkoporot noüccük nga'rupu worua enni appik. Kwethet ka kung ngKanang kothupuththuput itti kwio ere papu pothokiot ngüccük cik ipella lon ilokithak. Ngüccük ngung ngathikkieron tho'rillir nti ilon ilokithak ilanaron thio othakka itti aron ina akka oron orekine Kapik ikaik thupuththuput.

¹⁵ Ilen akka oMiccie pothakkanet pul pokathar pothonekkt lon cik ilie akin oKapik ana ul wung, othakka itti akkwion itha Kapik kakkarot akin opakot na'rupu ia

kwapponekkenthet kin cik thupuththuput. Akka oMiccie piot, kwelikkokin nti ilon ilokithak ilakin thokkothe llon lothonekket lon cik locittokit.

¹⁶ Ana nolon lothopakkot na'rupu, pul pella papakkot na'rupu amma pul pa'rupu pakinnio, ¹⁷ ana lon lothopakot na'rupu laka tulluk amma pul pa'rupu piot. ¹⁸ Ilen akka thonekket lon cik thocittokit thakorronno oreko ella ngüccük cik. ¹⁹ Akka oMucca pakkakkarinet ul appik lon lothonce'ret lon cik, kwonekathe ngüccük ngonyura ana ngonyittipit ngocikittakat ngng'ri ana tua to're ana tu'run ana pue akwo'rat natham ionat lon ilattul tit ana o'ro nul appik. ²⁰ Akwi'rekat itti, “Ngüccük engi ngothonekket lon cik ila Kapik ki'rethenon itti onon tha'rumo nan ana a'rupu iakin tha'rat nga'rama ngngin.” ²¹ Ana cakuruk kwo'rathe cü'rük ca'rama ngngüccük ana a'rupu appik iakkattat ngkamuthe. ²² Ana laik icat itti lon lothonce'ret lon cik loMucca li're itti lon lathikkietta lo'rillir appik ntho'rutta ngngüccük ana lon ilokithak lella ilaccikakat nthella thokiot papu poüccük cik.

²³ Ittina lonu itti urrut wa'rupu worothi'rot iaik nocapu wonu itti wathikkietta wo'rillir ntho'rutta ngngüccük ngothokeccet a'rupu woüccük cik, anaruk a'rupu worothi'rot iaik icaricat wonu itti wathikkietta wo'rillir ngngüccük ioporot. ²⁴ Akka oMiccie pakinni'riko iman ma'rama imupupure kannan ima pul iponyi pokkothe imokat purrut poman ma'rama imaik icat tothi'rot, kwi'rikot tothi'rot icat ana kwaik tokit koKapik inenni nti ilon lonnon. ²⁵ Kwakinni'riko tothi'rot othakka itti akwethet ka kung nuthuk attang ana attang ammakka pul iprik ponoppan toKapik okkot amma apeo noka'ran ikupupure kannan ca'ri culukku nothuput ngngüccük iakannoka ngung. ²⁶ Amma ittina aMiccie acciccokothe thiak ap-

pinappin nci ammakka capu coku'rettat ncik. Anaruk kwaat ca'ri culukku icekkot nan p'rin thupuththuput aluput lonocapu locothakothe akwathopa're pu'ran cik polon ilokithak p'rin p'rin nthiot thung. ²⁷ Ana ammakka pul iponyi ponu itti pio ca'ri culukku apanto'rikot thakkmako thung ²⁸ ittina oMiccie piot ca'ri culukku itti akwopa're lon ilokithak cik loul woppot ana kwappao ca'ri c'rek anaruk kwakannaine lon ilokithak loul anaruk kwao itti akwatho'ret ul iaik wa'rikothok.

10

OMiccie pinet ul appik ca'ri culukku

¹ Lon lothonce'ret lon cik loMucca lapurrut polon iloporot ilaik lanthan, purrut empi okorronno oka lon ilaik icat. Akka nthokecct a'rupu woüccük cik thupuththuput thakannothikkie ul woporot p'rin p'rin iaththa'rane Kapik nga'rama. ² Ana amma thokiot ngüccük cik thokat tha'ret kin, okin thace'ret thokiot ngüccük cik. Akka ul iocokothe lon nociküt waathakkat woporot ca'ri culukku kirrkkir, ana okin thakanninat ka ken itti okin thonu lon ilokithak. ³ Anaruk a'rupu wothokinthe Kapik ngüccük cik enni thupuththuput wothokwarttikiet ul lon len ilokithak, ⁴ akka lonthommat itti ngüccük ngonyura ana ngolicoc nganeko lon ilokithak.

⁵ Ittina, anakka oMiccie paat nocapu akwi'rekat Kapik itti,

“A'rupu wothokinthe Kapik ngüccük cik ana a'rupu wothethet nuthuk, waKapik k'rat,
anaruk ngkwoccenthin ka cik

⁶ Ngkwakannopira noka na'rupu wothokiot ngüccük cik iok'rettat ana wothokiot ngüccük cik nti ilon ilokithak.

⁷ Ana mpi'rekathe itti, ‘Kapik kin mpei,
lon lin lokkurrakot iatham itti,

Mpaat anathokkot lon ila ngkwongothe.’ ”

⁸ Kwi'ret cittokit itti, “A'rupu wothokiot ngüccük cik ana a'rupu wothethet nuthuk ana a'rupu wothokiot ngüccük cik iak'retta ana a'rupu wothokiot ngüccük cik nti ilon ilokithak, ana manna ngkwakannoka popirat noka nan” (antoka manna itti lon lothonce'ret lon cik li'ret itti lakkattat). ⁹ Ittina kwi'rekathe itti, “Mpei, mpaat itti anathokkot lon lang.” Kwopa'ret thonekset lon cik thorokit akwonekset ithommakittothe. ¹⁰ Ana ittina llon ila Kapik kongothe, oron appik thothikkiet-takathe thupupure nthio thoIeccuo oMiccie ngka kung itha kwinet ul appik ca'ri culukku.

¹¹ Ana appinappin pul ponoppa toKapik pakkot ngre ngung ngonoppa toKapik opakkukket tit akwethet Kapik a'rupu wothokiot ngüccük cik ammakka akwokkettet anaruk lon len lakorronno opa're lon cik ilokithak. ¹² Anaruk akka pul ponoppa toKapik empi ipa aMiccie, pethet Kapik a'rupu wothokiot ngüccük cik woma'ri appik ca'ri culukku nti ilon ilokithak, kwikkatheik thokkun wothothari woKapik. ¹³ Nci noca'ri cen kwokat cik akwo'rikot aKapik onekset ul i'rarak thoceken coracok tung, ¹⁴ akka mpapu pothokiot ngüccük cik pulukku kwothikkiekathe okkwion ithokat thupupure thoporot kirrkkir.

¹⁵ Cakuruk Kanang ikupupure kerethe elli aki'rekat itti, ¹⁶ Ili wi'ret itti, “Thonekset lon cik enthi itha anokkot inaththungon amma ca'ri ence're ceot ana mpanekset lon lothonce'rt lon cik lin nomikit men, ana mpakurrinset kin ima men.”

¹⁷ Akwapparttat nan itti, “Mpakannappokwarttikot lon len ilokithak ana ngre ngen iella lon cik.” ¹⁸ Ana na

lon ilokithak loccikakothe, a'rupu wothokiot ngüccük cik wolon ilokithak wakannappokaik.

Ngkwakkarakot accokot cikiit ilon

¹⁹ Ittina pangkingon oron thina nomiküt monon itti oron thaik thaeo noka'ran ikupupure kannan ngüccük ngoIeccuo, ²⁰ ana ngkathar kothikkoik ikie ikanyattanhet ton nthopa're kret kothopettoik ika ka kung, ²¹ ana inakka oron thonu pul ponoppa toKapik iprik iponu lon lonoppa toKapik ikkun, ²² ton eo iccik koKapik mmiküt moporot ana ona thocokot lon nomiküt thonthomat ana miküt mo'ruttat ngngüccük angothikkieron thoporot nolon ilokat nomiküt lokithak, ana ona ka kimettat ngng'ri ngo'rillir. ²³ Ton o'rumo notho'rikot cik thonnon itharon thonu nomiküt akka okkwi iponekkethe lon cik panno-prtto lon cik. ²⁴ Ton okorronno okorronno thaukko tothun ammakka ul w'rek iaik wakkot inenni, anaruk ton ittararot aron o'rungkat nan ittararot ammakka onon thimmat itti ca'ri cakko napuththut. ²⁵ Ton okorronno oco'ro nti itha'rntakot tothun ammakka opilingon okkettet, anaruk ton ittararot ammakka onon thina itti ca'ri cothao thung cakko napuththut.

²⁶ Amma oron tha'rungkot nolon ilokithat nci nokküt, aron thina lon ilaik icat, papu pothokiot ngüccük cik polon ilokithak pella cik ²⁷ anaruk oron thaik tha'rikot ca'ri enn're con're cothonce'ret lon cik coKapik ana thik thothongk'rikot kaik ithak're ul ialikine lon loKapik cik. ²⁸ Okkwi ip'rat lon lothonce'ret lon cik loMucca kwakkuttat amma ul we'ra ana manna w'rapuruk wi'ret itti lon len laik tit icat. ²⁹ Laka lokitheththak nopul iponu itti pakkmako ipocukkwarothe ukul woKapik cik ana okkwi ipokathat ngüccük ngothonekket lon cik iothikkierok po'rillir ere ngella lon cik ana okkwi ipocungkwot Kanang koKapik ikakeneron thiak. ³⁰ Akka onin thina okkwi

ipi'ret itti, “Oun akkake ana akkma.” Ana Ili wi'ret cakuruk itti, “Wakkma ul wung.” ³¹ Laka lokitheththak itti ngkwapot inyaun nyoKapik ikaik.

³² Nantokwarttikot akka nthokat ma'rot, akka onon nthocot k'ran, ana onon thothipathe cik kiththik ithokkiettat thiak. ³³ Ana onon thocungkakothe tokit koul ma'ri m'rek ana occokiettat thiak ana onon thoco'rothe ul iokat cik accokiettat thiak. ³⁴ Onon thonat thiak thoul iokat cik ikorrkkor ana onon thoccoke the thiak onaththungon, ana onon thokat thopirat noka akka ul wonnekothenon a'rupu, onon thongothe itti ul wanekot a'rupu wonocapu anthella thiak then, akka onon thina nan itti onon thonu a'rupu tothi'rot iakannomattat thupuththuput.

³⁵ Ittina nokorronno opa'rine thonekket cikit noKapik cik akka onon thathokketta llon iloporot kannan. ³⁶ Onon thonu itti onon thaccokot mikit ilon othakka itti amma onon akkokothe ila Kapik kongothe itti onon thakkot ana onon thakkettat nthokkettat thoporot. ³⁷ Akka noma'ri motte,

“Okkwi ipaik panthan, panthan ana kwakannoccoik.

³⁸ Anaruk ul win ioporot tokit koKapik wikkoik nthocokot lon nomikit,
ana amma kwopakkothe thoceken nti ilon lin,
ana mpakannopira noka naak.”

³⁹ Anaruk oron thakannoka okkwion ithapakkukkwot thoceken akin onguttakat, anaruk oron thoul ioccoke the lon nomikit ana itho'rettathe.

11

Thocokot lon loKapik nocikit

¹ Thocokot lon nocikit thinieron lon ilaron thaik tha'rikot ana thinieron lon ilaron thakinnimma.

² Thocokot lon loKapik nocikit thoul woma'rot akkokorronnot aul eret kin llon iloporot.

³ Nthocokot lon nocikit oron thina itti Kapik kokkothe capu ncik appik llon lung, ittina lon ilaron thaik thakathacce inenni lokkattathe nolon ilaron thakan-nimma. ⁴ Nthocokot lon loKapik nocikit thApil, kwe-thet Kapik papu pothokiot ngüccük cik poporot nopapu poKkain. Nthocokot lon nocikit thApil kwerettathe itti kwokat pul ipoporot ca'ri ica kerethe thethet thung nuthuk. Nthocokot lon loKapik nocikit Apil piot anaruk kwarthuk paik perettat antoka manna itti kwiot.

⁵ Nthocokot lon loKapik nocikit, Kapik konekot Anuk nothikkoik enthi, othakka itti akwokorronno io ana kwakinnincat akka Kapik konekorok. Anakka kwarthuk onekitta, Kapik ki'ret itti kwokat pul ipopiriet Kapik noka.

⁶ Ana amma oron thakannocokot lon loKapik nocikit, laka lonthomat itti oron thapirie Kapik noka akka okkwi ipainok ponu itti kwacokot lon lung nocikit itti kwaik ana itti kwakke okkwion ithaik thakwantot lon lung.

⁷ Nthocokot lon loKapik nocikit, Kapik ka'rettot naNua aki'rekathok lon ilathokaik ilakinnimmako ana nthothia cik ithupupure, kwokkathe kuppuru'ng kono'i'ri akwo'ret ul woruan thanung. Nthocokot lon loKpaik nocikit oNua pakkmakathe capu ncik appik ana kwothakkathe poporot tokit koKapik.

⁸ Nthocokot lon loKapik nocikit Aprein poccikothe lon loKapik akka kakkarorok itti kwaeo noka'ran ikathoka kung thupuththuput, kwocikathe lon lung ana kwo-ingkathe akkwomma na kwaik paeo. ⁹ Nthocokot lon loKapik nocikit Aprein punot kaman noththok ipa Kapik kakkonekkenthok lon cik itti kethok ere pul pok-wat noththok pokwat, kwikkot cik imü'rük mokaman

muntat neret ammakka oIccaak ana oIakup itha Kapik konekkenthet lon cik lulukku itti okin thapakkot nocapu. ¹⁰ Akka Aprein pokat cik akwo'rikot ka'ran ika'rungkot cik thupuththuput ika Kapik kunot.

¹¹ Nthoccokot lon loKapik nocikit Aprein okin opari oCcara, thokwonathe ukul akin thukkwat ana oCcara pokat pucung. Aprein pothakkakathe oththan ponyukul akka kwonat lon nocikit itti Kapik ikonekkenthet lon cik kannoprto lon cik. ¹² Ittina nti ipul empi pulukku ipa pukkwat ere pio nyukul nyokwontat nti iaak nyoppot ere mothot ana inyomma ongantetta ere kamur konorue.

¹³ Ul enni appik woccot lon ilonekkettanthe kin cik nthoccokot lon loKapik nomikit. Okin thillet akin thakannokkattanthe lon l'rek nti ilon ilonekkettatheik anaruk Kapik kokenet kin nolon len nciththan ana okin thangkathe. Okin thangkathe itti okin thokat kwat nocapu. ¹⁴ Ul iere lon ammakka elli waik wakene itti okin thaik thakwancot ka'ran ken. ¹⁵ Akka amma okin thokat akin okwarttikot pothok ipa akin thoththet nan, okin thaiothe kathar ikakin opakkot ngingin. ¹⁶ Anaruk okin thokat akin okwancot ka'ran ikoporot korothi'rot. Ittina Kapik kopirat noka itti kaka Kapik ken akka kokuccenthet kin ka'ran cik.

¹⁷ Nthoccokot lon nocikit loKapik, Aprein pappongothe itti kwethet Kapik ukul wung oIccaak karkko papu pothokinthet Kapik ngüccük cik ca'ri ica Kapik kennekkerok. Ook ipa Kapik konekkenthet lon cik, kwokat pongothe itti kwethet Kapik ukul wung iulukkuppu. ¹⁸ Ana manna Kapik kakki'rethok itti, “Nti ikkul wang oIccaak thiki thang thaka thoppot.” ¹⁹ Aprein paponekkethe lon nocikit itti Kapik kurokwie ul iilet ana ngkathar k'rek kurokiet olccaak nti ithio.

²⁰ Nthocokot lon loKapik nocik̄it, oIccaak pethiet oIakup ana oIcco thethieko tholon ilanthan.

²¹ Nthocokot lon loKapik nocik̄it, olakup pethiet nyukul nyoluccip akwa'rakat nga'rama akwirroik nocu'rang cung akka kwappukkwat.

²² Nthocokot lon loKapik nocik̄it, oIuccip perenet ul woIccereil lon lothoppot thapat noththok poMuccir ana erenekin lon loka kung amma kwiot akin oneko kumi akka kwokat pukat.

²³ Nthocokot lon loKapik nocik̄it, oththan ana onnan poMucca pamu'ruttot oMucca anak w'rapuruk akka kwokwontat akka okin thaththimmat itti kwokat ukul pellek ana okin thellat n're nolon lothonce'ret lon cik loili woMuccir.

²⁴ Nthocokot lon loKapik nocik̄it, akka oMucca pocokkat kw'rakathe akkarako itti ook ukul wokkul iopari woPoroun. ²⁵ Kwangkathe itti kwaccokot thiak okin oul woKapik nothikkoik ilon ilopeththre lolon ilokithak noma'ri motte. ²⁶ Kwokathat itti loporot itti kwarakketta nti ilon loMiccie nothona a'rupu iopreththere woMuccir. Kwokat akwo'rikot thokketta itha Kapik okkekok nngin. ²⁷ Nthocokot lon loKapik nocik̄it, oMucca poththet noththok poMuccir akkwella n're nothua ka thoili, kwocokotho cik̄it ilon akka kwimmat okkwi ipa pul pella pimmat. ²⁸ Nthocokot lon loKapik nocik̄it, kwokkotho kamuthe koThaurrot kaman k'rek cik ko'rungkathe cik ana o'ro ngüccük nngin othakka itti anyukul inyokwontat nyonothon nyoIccereil inyomura okorronno ongutta nu'rupa wothonguttetto.

²⁹ Nthocokot lon loKapik nocik̄it, ul woIccereil wokkot irok irapangka ironu k'ran itti tok tocakak ere okin thokkot nocapu iconthomat anaruk akka ul woMuccir wonekket itti wakkot menik cakuruk wikikkathe ng'ri.

³⁰ Nthocokot lon loKapik nocik̄it, arrang wonoka'ran kAria wapukkot akka ul woIccereil wamaraththakothē ma'ri me're'rapuruk.

³¹ Nthocokot lon loKapik nocik̄it, oRaap pul ipalle nul nakucci pamu'ruttot ul iattet lon ana ul iomma'ron wakannokkwathok.

³² Ngintha akka anapperene non, mpella ca'ri ica anerenenon lon loCathaon ana loParak ana loComuccun ana olappaththa ana loThauth ana loCamuil ana loul wothernte lon loKapik. ³³ Nthocokot lon loKapik nocik̄it okin thalkathe a'ran wonili ana okkot lon iloco'rotheik ana okin thokkattakanthet lon ila Kapik konekkenthet kin cik ana okin thikkathe cik itho'rikit tholepa ana lakorronno o'rko kin. ³⁴ Okin thokkwothe thik ana ikkoik nti ithokkuttat ngk'rittang, okin thaththommangka ana okin thothikkiettat thonthomat akin ipat pu'ran pomaththik akin alkat ul irro iokat kwat. ³⁵ Ul iari wocot ul wen iurokot nti ithio anaruk a'rek wokkiettathe thiak a'rakat itti welikkako othakka itti akin iot thikkoik ithoporot amma okin thillet. ³⁶ Opilingon thokkattathe ngure nan ana opilingon opoko ana opilingon thi'rik̄ikkakat ana ittat ikorrkkor. ³⁷ Opilingon thonguttat u'runcakat cik mmothok ana opilingon thokeccettat tit ana opilingon thonguttat ni'rittang iukwit wukwit ana opilingon thokiccettat akin thakot u'rat wolangkat ana wolicok noka, okin thokkiettathe thiak ana okwiēttat ana 'rako okin thokat thongothe. ³⁸ Okin thokat th'rat lon lonocapu. Okin thonyaratheik ika kothampang ana nomo'rong ana ia'ranthang womu'rol ana inupu nocapu ana capu canneko nakin.

³⁹ Ul wen appik werettathe llon lothocokot lon loKapik nomik̄it len anaruk okin thakorronno okkattakanthet ila Kapik konekkenthet kin cik. ⁴⁰ Kapik konekkenthet ton

lon l'rek cik iloporot nelli othakka itti unaththungon okin thathakka thoporot kirrkkir.

12

Kapik kacimitto nyukul nyung

¹ Ittina inakka oron thaik iul woppot immat lon ngkit, ton opa'rine lon ilaik lalikineron cik ikathar appik ana lon ilokithak ili'riththaron othakka aron ullattarne nthulattarne ithakin thokenetton naron oco'ro. ² Ton ocot kit naleccuo ipoku'ret thocokot lon nomikit thonon nci ana ook ipamartto thocokot lon mikit thonon, ook iporukothe ithokinya thothapak ana orakke thothia cik then nti ithopira noka ithokat tokit kung ana kwikkatheik thokkun wothothari woprrok poili poKapik. ³ Nokwarttikot okkwi iporukwothe ilon ana ipoccoke the cikit ilon noul wolon ilokithak, othakka itti annokorronno apo ka ntit annapukko.

⁴ Nothorro thon ilon ilokithak, ntharthuk thakannorro puccuk annillekat. ⁵ Ana ngkuret nolon lothittararot ilerenenon karkko nyukul itti,

“Ukul win, okku kunu nci amma Ili ocimittong,
kirrnni apo ka ntit amma akwocimittong.

⁶ Akka Ili wacimitto okkwion itha wongothe
ana wakkma ul ia woccoke the ammakka ukul wung.”

⁷ Norukot ithokinya annokatha ere thocimitto, akka Kapik kaik kakkot lon nanon ammakka nyukul nyung akka ukul wiatha iaththan okorronno ocimitto. ⁸ Amma onon thakannocimittako, (ana ul appik wocimittakot), ittina onon thakannoka nyukul nyoruan ana onon thakannoka nyukul icat. ⁹ Ana kannan oron appik thonu oNgappan thonnon thocimittot ton ana oron thocicicikothe lon len. Laka loporot kannan itti oron thaccikot lon loNgappa

poKantang konnon aron ikkoik. ¹⁰ oNgappan thonnon thocimittot ton noma'ri motte ngkathar ikakin thimmat itti koporot. Anaruk Kapik kacimittoro aron oka thoporot thupuththuput othakka itti aron ona thupupure itha kwonu. ¹¹ Thocimittaro thella ithapirietto noka ca'ri cen, anaruk thak'rettot ka cik. Anaruk noma'ri imanthan thanane okkwion ithongkenettat thoporot tokit koKapik ana thoporot akin ikkoik thoporot.

¹² Ittina opo'rie nyaun than athipat cik kiththik. ¹³ “Nokkinthet tacok ton kathar koco'rotheik ana konyra” othakka itti okwi ipakimico okorronno o'rungskot kimico anaruk akwittat.

No'rumoik nolon loth'ra lon loKapik

¹⁴ Okwantothe kathar ikikkieng cik poporot nul appik ana oka pupupure akka amma thupupure thella ana pul pella pimma Ili. ¹⁵ No'rumoik akka pul omone thoporot thoKapik, annokathakat itti pul pella ipokithak ca akka apokitto opilingon ma. ¹⁶ Nokatha itti pul pella iponu namat ana 'ra Kapik ammakka oIccu ipokerot p'ran pung pothothokwonta nothon nthu'rit. ¹⁷ Ana noma'ri motte ammakka nthina akka kwokat itti kwapakkot nopa'ran pothothokwonta nothon okin th'rakanthok. Ana kwikkatheik akwoo akka kathar kella ika akwokkprtto p'ran nngin.

¹⁸ Onon thakannao noco'rong icimmako ana othantako icaik cak'ro ana cik crrin ana conu kopopo, ¹⁹ okin thoccikothe po're pothipil akin occikat aKapik ere. Okin thipittathe oMucca itti aKapik okorronno apperenekin ittina, ²⁰ akka okin thommat onongkwot ilonthomat ilokat cik aleretta “ana manna amma papu porua pocukkwot noco'rong cen ana pakincakot

cik mmothok.” ²¹ Thokathacce co'rong thipiettot n're kannan mono aMucca i'rekat itti, “Mpipot n're kannan ana manna mpaik pakkwe ka.”

²² Anaruk onon thaata noka'ran koCiun ciki Uruccelim worothi'rot noka'ran koKapik ikaik ana nau'rupa wothothilettat woKapik waik athar athar wa'rantakothe awopirat noka, ²³ onon thaata noppan toKapik icungkut coul iocckothe lon loIeccuo nothon ica'rane Kapik nga'rama, ionu 'ran wokurrakothe tokapik. Onon thainet Kapik ikance'renthe ul lon cik appik onon thainet Kanang koul ioporot tokit koKapik ana wothikkiettat woporot kannan. ²⁴ Onon thainet oIeccuo pul pokathar pothonekket lon cik ilie ana onon thainet ngüccük io'ruttat ncik iere lon loporot noüccük ngApil. ²⁵ No'rumoik annokorronno 'rak ipaik pere. Akka amma ul w'rat okkwi ipere lon ngKanang koKapik cene nocapu ana okin thakannolukkwat thakkmako thoKapik, oron thalukkwo taththa oron ith'rat occikot lon lökkwi ipaat ntothi'rot? ²⁶ Noma'ri men po're pung po'rintittot capu, anaruk inenni kwonekkethe lon cik akwi'rekat itti, “Mpaik pakannatho'rintitto capu culluk attang anaruk tothi'rot cakuruk.” ²⁷ Lon itti “Attang” lakene itti thopa're tha'rupu cik iapa'rettaik ammakka itti a'rupu ioku'rettat ncik othakka itti a'rupu iakanno'rintittako ncik o'rungkwot cik.

²⁸ Ittina inakka oron thaik thocco ngili iakanna'rintittako ncik, ton opirane Kapik noka ana a'ranok nga'rama ngkathar ikoco'rotheik ana nthothianok cik, ²⁹ akka “Kapik konnon kathik itha'rkoik.”

13

Lon ilacothot lothomereket

¹ No'rungkot nothongarot ammakka ul iocokothe lon loMiccie. ² Nokorronno urenan itti nthikkie ul wonokwat cik lon loporot, akka opilingon thikkiet u'rupa wothothilettat woKapik cik tuan thanen akin thomma. ³ Nokwarttikot okkwion ithaik ikorrkkor, nokatha ere nthaik ikorrkkor naththungon, ana okkwion ithakkiet-tat thiak mpangken ere oung akkaik pakkiettat thiak. ⁴ Thīpa thonu itti thathiakine cik nul appik, nokorronno a'rangkal woul ittettot a'rungkot wupupure, akka Kapik kakkma ul iaththe nallen ana napanion akin otha'ro nul w'rek ana ul ia'ro nul nuthuk. ⁵ Nokorronno occot kit nakucci kannan anaruk nopira noka na'rupu ia nthonu, akka Kapik ki'ret itti,

“Mpakorronno ure nanon
ana mpakorronno oththe nanon.”

⁶ Ittina oron thi're thella n're aron i're itti,
“Mpella n're akka Ili waik wittarothin
pul iponyi pakkinthin ngintha?”

⁷ Nokwarttikot ul iama mon ierntenet non lon loKapik. Nokwarttikot kathar ikakin thikikkot cik ngngin, nin-nikot thocokot lon nocikit loKapik then. ⁸ Oleccuo oMiccie ook pulukku, ook pomeccin ana poinenni ana pothupththuput. ⁹ Kirrnni okorronno itti thongkene enthi appik ithaik prek thaprttong cik. Akka loporot itti mikit monnon mathakka monthomat nthoporot thoKapik ana okorronno oka nthu'rit thokamuthe ithella lon cik. ¹⁰ Oron thonu tu'rot ta'rama tothokinthet Kapik papu pouccuk cik ipa pul iporekot icü'rük icuntat neret pakan-no'rko. ¹¹ Pul iprik ponoppan toKapik paneko ngüccük nga'rupu ionguttat akw'riko ngngin noka'ran ikupupure

cannan akwothethet Kapik nti ilon ilokithak loul, anaruk ka ka'rupu wen kak'rettat nocuruk thapat. ¹² OIeccuo cakuruk pokkiettathe thiak thapat noka'ran othakka itti akwothikkie ul wupupure ngüccük ngung. ¹³ Ittina ton oinok thapat noka'ran akin othocokiet ton thiak ithathittoik ithakin thocokiethok. ¹⁴ Akka oron thella ka'ran konnon cene kothupuththuput anaruk oron thaik tha'rikot ka'ran ikathokaik thupuththuput. ¹⁵ Ittina ton o'rungkot nothethet Kapik thopira noka oleccuo ngngin nthon ithangante k'ran koKapik. ¹⁶ Ana nokorronno urenan itti onon thakkot lon iloporot ana okkinthet opangkangon th'rek, akka nthokkot lon len onon thapirie Kapik noka. ¹⁷ Noccikot lon loul iama mon annokkat ilakin erenenon itti onon thakkot. Akka okin akkaik thangwot non karkko ul iathipittakot lon lon. Noccikot kin othakka itti akin opira noka nore ngen ana angre okorronno okane kin ngim'in akka lakannokanenon loporot. ¹⁸ Nokorronno oco'ro ntitha'ranen'in nga'rama. Akka on'in thina itti mik'it min mella lon ilokithak ana on'in thongothe itti on'in thikkoik thikkoik ithathiakine cik. ¹⁹ Mpongothe anganna itti ntha'ranin nga'rama othakka itti anokkaprttakinenon accokkot.

Nga'rama iacothot ana thomicco

²⁰ AKapik kothomicco ngngüccük ngothonekket lon cik lothupuththut ikurokiet Ili wonnon oleccuo nti ithio ook iprik ipu're langkat, ²¹ akwittarot non llon ana a'rupu ap-pik annokkot lon ila kwongothe, ana akworeko iaron llon ilapiriek noka ngk'ran koleccuo oMiccie okkwi ipathrik oine thothupuththut. Amin.

²² Pangkingon, mpipittot non itti nokkwine lon lin elli kunu ncik lothittarot akka mpokurrinet non lotteik tulluk.

²³ Mpongothe itti onon thina itti opang ponnon oThimiththaoc popelikkakot nti ikorrkkor ana amma ook akkaat accokkot ana onin thainenon innaththe'ra innathokatha nanon.

²⁴ Nomicco ul woma won appik ana ul woKapik. Okkwion ithaat noththok poIththalia thothiothe thon itti okin thaik thamicco non. ²⁵ Athoporot oka nanon appik.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243faecee